

四庫全書

集部

欽定四庫全書

集部

宋詩紀事卷十九

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱圻

謄錄監生臣蔣鳳姓

欽定四庫全書

宋詩紀事卷九

錢塘厲鶚撰

蘇耆

耆字國老易簡子大中祥符間以父任仕至工

部郎中直集賢院

題虎丘

虎踞標靈跡危樓杳靄間  
劒池沈石壁金地湧秋山  
塔映松軒斷雲迷蘚逕  
斑磬隨靈籟盡鶴伴老僧閒  
有句

慚先哲無辭愈厚顏我來聊寫望頓覺離人寰

虎丘志

王初

初宋初人有歌詩一卷

文獻通考陳氏曰初有延平天慶觀詩當是祥符後人

青帝

青帝邀春隔歲還月娥孀獨夜漫漫韓憑舞羽身猶在  
素女商弦調未殘終古蘭巖棲偶鶴從來玉谷有離鸞  
幾時幽恨飄然斷共待天池一水乾

書秋

千里南雲度塞鴻  
秋雲無跡淡平空  
人間玉嶺清霄月  
天上銀河白晝風  
潘賦登山魂易斷  
楚歌遺佩怨何窮  
往來未得如張翰  
欲鱸霜鯨碧海東

自和書秋

隴首斜飛避弋鴻  
顏雲蕭索見層空  
漢宮夜結雙莖露  
閭闔涼生六幕風  
湘女怨弦愁不禁  
鄂君香被夢難窮  
江邊兩漿連歌渡  
驚散遊魚蓮葉東

春日詠梅花

靚妝纔罷粉痕新  
迢遞風回散玉塵  
若遣有情應悵望  
已兼殘雪又兼春

卽夕

風幌涼生白袷衣  
星榆纔亂絳河低  
月明休近相思樹  
恐有韓憑一處棲

舟次汴堤

曲岸蘭叢鴈飛起  
野客維舟碧煙裏  
竿頭五兩轉天風

白日楊花滿流水

以上宋藝圃集

任玠

玠字溫如蜀人大中祥符末以凌公策薦入京  
進龍圖紀聖詩一千韻酬以汝州團練推官三  
讓乞授一子官

題黃休復茅亭

聚散榮枯一夢中西歸親友半成空唯餘大隱茅亭客

垂白論交有古風

茅亭客話

魯宗道

宗道字貫之亳州譙人舉進士為海鹽令天禧元年擢右正言神宗卽位累拜右諫議大夫參知政事遷禮部侍郎卒贈兵部尚書諡簡肅

登黃山

三十六峯凝翠靄數千餘仞鎖嵐煙軒皇去後無消息  
白鹿青牛何處眠

蓮花源



花開十丈照峯頭，露褪紅衣爛不收。  
太乙真人多逸興，穩眠一葉汎中流。

以上黃山志

### 賈昌朝

昌朝字子明，獲鹿人。天禧初，召試，賜同進士出身。  
慶歷間，拜同中書門下平章事。英宗卽位，加左僕射，進封魏國公。卒，諡文元。有集。

### 題文潞公曲水園

鶚按：此詩風月堂詩話作晁迥。

畫船載酒及芳辰，丞相園林潞水濱。  
虎節麟符拋不得，

卻將清景付閒人

石林詩話曲水園在許昌城北有大竹三十餘畝  
溪河貫其中以入西湖最為佳處初為本州民所有  
文潞公為守買得之潞公自許移鎮北門而文元為代  
一日挈家往遊題詩壁間云云遂走使持寄北門潞公  
得之大喜即以地券歸賈氏文元亦不辭而受後文元居京師亦不復至園  
今荒廢竹亦殘毀過半矣

凌霄花

披雲似有凌霄志向日寧無捧日心  
珍重青松好依託

直從平地起千尋

全芳備祖

王贄

贄字至之廬陵太和人天禧三年進士慶厯中  
官殿中侍御史歷戶部侍郎致仕

過吳江

吳江秋水灌平湖水濶煙深恨有餘因想季鷹當日事  
歸來未必為蓴鱸

中吳紀聞

蘇紳

紳字儀父晉江人天禧三年進士仁宗朝累官

史館修撰擢知制誥翰林侍讀學士集賢殿修撰出知河陽卒

金山寺

九派江流涌化城登臨潛覺骨毛清僧依玉鑑光中住  
人踏金鰲背上行鍾阜雲開春雨霽海門雷吼夜潮生  
因思絕頂高秋夜四面雲濤浸月明

鎮江府志

王達

達濮陽人天禧三年進士官刑部郎中

句

下臨廣陌三條濶斜倚危樓百尺高

詩話總龜福唐有老嫗當壚有舉子謂曰吾能與爾致數十千乃令嫗作酒帘題句云云太守王祠部達見之大喜呼嫗與錢五千乃王公咏酒旗詩平生最得意者

鄭修

修吳郡人天禧三年進士

玉簪花

玉色瓷盆綠柄深夜涼移向小窗陰兒童莫訝心難展

未展心時正似簪

全芳備祖

余弼

題慧悟禪師上方

禪師天禧中居錢塘月輪山

孤峯牢落幾何年  
臺殿于今插半天  
已是精藍誇絕徼  
更將寶塔在危顛  
煙霞色任陰晴變  
鐘磬聲隨上下傳  
珍重老僧無別境  
一生幽趣只山川

咸淳臨安志

曹汝弼

汝弼字夢得其先青州人南唐時徙歙之休寧

祥符天禧間高蹈有聲與魏野潘閬林逋善有  
海寧集

再寄披雲峯誠上人

江城從別後聞說在松間度日長扃戶終年不下山靜  
為詩所役閒免事相關應喜雲邊客冥搜鬢未斑

喜友人過隱居

忽向新春裏閒過隱士家旋收松上雪來煮雨前茶禽  
換新歌曲梅妝隔歲花應慚非遁者難久在煙霞

贈披雲峯岳長老

禪外掩松扃，閒眠度歲陰。  
雨侵香篆濕，苔長屐痕深。  
水在銅瓶冷，雲歸玉磬沈。  
前山有靈藥，時策杖藜尋。

以上瀛奎

律髓

宋 綬

綬字公垂，趙州平棘人。以外祖楊徽之遺恩授太常寺太祝。真宗召試學士院，為集賢校理。仁宗朝，歷兵部尚書、參知政事，卒，贈司徒兼侍中。



謚宣獻有文館記事外制禁林甲乙祕殿遺札

七集

上元以修史促成書特免扈從因賦

屬官不得陪春豫結客何妨事夜遊還勝南宮假宗伯

黃扉深鎖暗登樓

蔡寬夫詩史故事春試進士皆在南省中東廂  
刑部有樓甚寬壯旁視宣德門直抵州橋鎖院  
每以正月五日至元夕例未引試考官往往竊  
登樓以望御路燈火之盛宋宣獻公在翰林時  
上元以修史促成書特免扈從嘗賦詩云云蓋  
謂此也至嘉祐中歐陽文忠公知舉梅聖俞作

莫登樓詩諸公相與唱和自是遂為禮聞一盛事

送何水部蒙出牧袁州

梧楸初謝楚天涼  
新見腰間換印囊  
漁浦霧濃沈疊鼓  
湓江風急下危檣  
帝城雲表瞻龍首  
故國星邊認劍光  
退食齋中多燕喜  
暖泉春釀泛瑤觴

袁州府志

句

奇材劍客當前隊  
麗賦騷人託後車

皇朝類苑

江涵帝子顰飛閣  
山際真君鶴馭天

優古堂詩話豫章事實王子安序之詳矣題咏此邦者往往採之晏元獻云望斗氣沈龍已化置芻人去榻猶懸陶雍州云劍待張華時已晚榻延徐孺禮應疎此二聯全是龍光射牛斗之墟徐孺下陳蕃之榻也宋綬公垂云云不襲陳跡甚可佳也

憶昔唐家扃禁地粉壁曲龍聞曩記承明意義今頓還  
永與鑾坡為故事

蔡寬夫詩史學士舊院與宣徽院相鄰玉堂兩壁有巨然畫山董羽畫水宋宣獻為學士時燕穆之復寫六幅山水屏寄之遂置于中間宣獻詩云云唐翰林壁畫海曲龍山故引用之

薛奎

奎字宿藝絳州正平人進士及第累官龍圖閣  
待制權知開封府仁宗朝授樞密直學士知益  
州召拜參知政事罷為資政殿學士卒贈兵部  
尚書諡簡肅有集

詩話總龜薛簡肅公尹開封以嚴為治謂之薛  
出油其後牧成都歲豐人樂作春遊好十首自  
號薛春遊欲換前稱也

寄金繩院正因大師

僧中憶藝本超羣釋氏蒙求見討論儒行合為文暢侶

詩名雅作貫休孫心燈久已傳宗意命服仍嘗錫帝恩  
宴坐梅檀消篆字眼前闌闌任囂喧

成都文類

### 龐籍

籍字醇之單州武成人舉進士仁宗時為侍御  
史歷天章閣待制元昊反為陝西安撫使召拜  
樞密使同中書門下平章事加觀文殿大學士  
以太子太保致仕封潁國公薨贈司空謚莊敏  
有清風集子元英朝散大夫著文昌雜錄

司馬溫公序畧公性喜詩雖相府機務之繁邊庭軍旅之急未嘗一日置凡所以怡神養志及逢時值事一寓之於詩

東軒筆錄陳文惠與龐穎公同戊子生陳已貴龐尚為小官嘗戲龐曰君乃小戊子耳後穎公大拜文惠致書賀曰今日大戊子卻為小戊子矣穎公笑之

記異

冬至子時陽已生道隨陽長物將萌星辰賜告銘心骨願以寬章輔至平

南窗紀談莊敏公帥延安日因冬至奉祠家廟齋居中夜恍忽間見天象成文云龐某後十年

作相當以仁佐天下凡十三字駐視久之方減  
公因作詩記之

句

田園貧宰相圖史富書生

退老作

歷代吟譜

陳執中

執中字昭舉南昌人真宗朝以父恕任祕書省  
正字上建儲議擢右正言皇祐初累官吏部尚  
書同中書門下平章事拜司徒岐國公卒贈太  
師兼侍中諡曰恭

東軒筆錄陳恭公初罷政事判亳州年六十九  
遇生日族親往往獻老人星圖以為壽獨其姪  
世修獻范蠡五湖圖且贊曰賢哉陶朱霸越平  
吳名遂身退扁舟五湖恭公喜甚即日上表納  
節明年累表求退遂以司徒致仕

御溝柳

一度春來一度新翠光長得照龍津君王自愛天然色  
恨殺昭陽學舞人

東軒筆錄陳恭公以衛尉寺丞知梧州驛遞上  
疏以乞立儲貳真宗嘉其敢言朔日臨朝袖其  
疏以示執政歎獎久之召為右正言然為王冀  
公所忌一日真宗賦御溝柳詩宣示宰相兩省



皆和進恭公因進詩云云

惠安縣齋咏梅

去年邊上見梅花醉眼淹留未到家今日嶺南攀折得

忽驚身又在天涯

泉州府志

夏竦

竦字子喬江州德安人以父死事補官真宗朝  
舉賢良除光祿丞仁宗朝累擢知制誥拜同中  
書門下平章事封英國公後改封鄭卒贈太師

中書令諡文莊有集

江州琵琶亭

年光過眼如車轂，職事羈人似馬銜。  
若遇琵琶應大笑，何須涕泣滿青衫。

中山詩話

知杭州到任寄執政

造化平分荷大鈞，腰間新佩玉麒麟。  
南湖不住栽桃李，擬伴沙禽過十春。

題睢陽

海鴈橋邊春水深畧無塵土到花陰忘機不管人知否

自有沙鷗信此心

以上湘山野錄

### 詠藏撇

舞拂跳珠復吐丸遮藏巧技百千般主公端坐無由見  
卻被傍人冷眼看

墨客揮犀丁晉公與夏英公會宴齋宮伶人有  
雜手技號藏撇者在焉丁顧夏曰古無咏藏撇  
詩內翰可作一首即席獻詩云云

### 登通州狼山

侍父監通州狼山鹽場作時年十七

渡口人稀黯翠煙登臨嘗怯夕陽天殘雲右倚維揚樹  
遠水南回建業船山引亂猿啼古寺電驅甘雨過閒田  
季鷹死後無歸客江上鱸魚不直錢

澠水燕談

應廷試

殿上衮衣明日月硯中旗影動龍蛇縱橫禮樂三十字  
獨對丹墀日未斜

青箱雜記夏竦試制科廷對出楊徽之見其年  
少遽遜與語曰老夫他則不知唯喜吟咏願丐  
賢良一篇以卜他日之志夏忻然為書此作

再徙西都詠青雀寄張昇諫院

弱羽傷弓尚未完孤飛誰敢擬  
鴛鴦明珠自有千金價

莫為遊人作彈丸

古今詩話

上元應制

魚龍曼衍六街呈金鎖通宵啓玉京  
冉冉遊塵生輦道遲遲春箭入歌聲  
寶坊月皎龍燈淡紫館風微鶴唳平  
宴罷南端天欲曉迴瞻河漢尚盈盈

詩話總龜

國清寺

穿松渡雙澗宮殿五峯圍小院分寒水虛樓半落暉葉  
從金地下雲向玉京飛欲問西來意誰傳智者衣

桐栢觀

鳥道寒藤結洞門蒼蘚深樓臺在山畔松檜出雲心土  
暖春長在峯高月易沈羽衣祠太乙香冷石壇陰

以上天台

山志

句

山勢蜂腰斷溪流燕尾分

東軒筆錄夏鄭公疎以父歿王事得三班差使  
然自少好讀書工為詩一日攜所業伺宰相李  
文靖沆退朝拜于馬首而獻之文靖讀其句深  
愛之翊日袖其詩呈真宗及敍死事之後乞與  
換文資遂改潤州金壇主簿

野花無主傍人行

嘉祐雜志

張環

環字唐公洎之孫舉進士召試學士院賜第累  
擢知制誥進翰林侍讀學士出知濠州

寄題徑山懷郎簡侍郎

天地一洲渚北平南敵危幽并深以厚江浙清且奇武林頗幽秀川匯仍山卑應接殫天巧類非人力為徑山最佳處有巖稱玉芝居防俗士駕地乃賢人宜郎公留名德平時為羽儀引年歸故里不復衣朝衣留侯黃石心白傅香山期結宇名勝外日與塵事違泉石景物狀盡在諸賢詩伊余來東藩濫持使者麾平生愛山水弗憚命駕之當候秋風高遠造巖下扉澣濯纓上塵散步松間綦未能繼高躅聊用慰所思

宋文鑑



畢田

田長沙人真宗朝以吏部郎兼王府侍講奏蠲  
臨湘七都科調里人德之因祀焉曾撰湘中故  
事

朱陵洞水簾

洞門千尺挂飛流玉碎珠簾冷噴秋今古不知誰卷得  
綠蘿為帶月為鉤

凝碧亭

在南岳石橋上

四面山屏疊萬重古嵐濃翠鎖寒空清秋獨倚危闌立  
身在琉璃世界中

石霜寺

石霜寺在瀟陽縣南八十里有崇勝禪院  
普普會禪師居衆千餘名其堂曰枯木蓋

取其宴寂也廉使丞相裴公嘗親枉大旆詣之  
留玉環象笏於此迄今存焉

石上泉華噴猛霜境竒因此闢禪坊使君環笏留何用  
枯木千餘滿一堂

香水

湘中別記云在縣郭內其水甚香昔年嘗貢  
此水民多困弊齊末因罷以板覆之上起塔

至今存湘鄉本謂之湘香蓋由此而名

坎上浮圖已拂天椒蘭餘馥尚依然九重無復修常貢  
空有香名與邑傳

以上湘中故事

穆修

脩字伯長鄆州汶陽人真宗東封詔舉齊魯經  
行之士預選賜進士出身調海州理掾忤監郡  
坐削籍隸池州遇赦敘潁州文學參軍卒自五  
代文敝至修始獨為古文有穆參軍集

五朝名臣言行錄公登進士第後為潁州文學  
參軍人稱之曰穆參軍家有唐本韓柳集乃丐

予所親得金用工鏤板印數百帙攜入京師相  
國寺設肆鬻之有儒生數輩至肆輒取閱公奪  
取怒謂曰先輩能讀一篇不失一句當以一部  
相送遂終年不售時學者方從事聲律未知古  
文伯長始為之倡其後尹洙師魯始從之學古  
文又傳其春秋學

江南寒食

江城水國春光饒清明上巳多招要花陰連絡青草岸  
柳色掩映紅闌橋歌調嘔啞雜吳俗髻鬟疎削傳南朝  
誰憐北客歸未去楚魄湘魂唯暗消

燈

黯黯有時當永恨依依何處照閒眠靜臨客枕愁寒雨  
遠出漁篷耿暝煙纖影乍敲還自立冷花時結不成圓  
銷魂猶憶江樓夜曾對離觴賦短篇

和茅秀才江墅幽居好

江墅幽居好溪山數里長徑通茶塢綠門帶橘園香藉  
石還勝榻聽松不讓簣閒遊驚里巷自作隱淪裝

以上  
穆參

軍集

張觀

觀字思正絳縣人中服勤辭學科為祕書郎仁  
宗朝歷官同知樞密院事以觀文殿學士知許  
州卒贈吏部尚書諡文孝

句

保心如止水為行見真書

歷代吟譜張思正平生未嘗草書因自為詩

薛田

田字希稷河中河東人舉進士歷益州轉運使

累擢龍圖閣待制樞密直學士知益州遷右諫  
議大夫知同州

成都書事一百韻

井序

金躔輿壤玉壘名區風物尚饒曠古稱最僕守茲職  
任五年再至初則木牛流馬馳八使以均財次則阜  
蓋朱轡奉一麾而作鎮歷覽勝異慷慨興懷古人曰  
非感發不可以言詩非聲詩不可以導志故言成志  
激流為美談偶因公退輒作成都書事七言一百韻

止陳乎益都事蹟罔暇以外景加諸庶幾謬發於斐然詎敢芳揚於作者詩曰

混茫丕變造西阡物像熙熙被一川易覺錦城銷白日  
難歌蜀道上青天雲敷牧野耕桑雨柳拂旗亭市井煙  
院鎖玉溪留好景坊題金馬促繁弦風流鋪席堆紅豆  
瀟灑門庭映碧鮮表狀屢言同穎穗敕書頻獎竝生蓮  
旋科杞樹吹香稻剩種畹巢沃晚田仁宅不隲由政立  
議闡無取任情遷民知禮遜蠶叢最後俗尚奢華遠古先



遶郭波濤來浩浩歸朝歧路去綿綿乍回黑水將成道潛  
到青羊恐遇仙靚女各攻翻樣繡袷商兼制研綾牋壚  
邊泛蟻張帟幄江上鳴鼉簇綵船石筍峻嶒衙對峙琴  
臺恢濶寺相連羣葩豔裏珍禽語百草香中瑞獸眠喜  
趣必臻尤佇望勝遊爭倦更遷延早荷葉底蹲鴟伏椶  
樹梢頭亂蜨穿蘼發牢盆渾棄鹵鐵資園法免胚鉛豐  
饒物態寧殊越美麗姝姬酷類燕西海號雄彰傳紀南  
康辭健積銘鐫良工手技高容學妙隱丹方祕不傳倚

劍靈關凌絕頂夢刀孤壘削危巔金華巷陌遺三品石  
鏡伽藍露一拳信落荊州隨鼓柶檢頒芝闕聽搖鞭若  
量內地寒暄異且在遐陬水陸全渝舞舊云傳樂府已  
談誰曰繫言詮九苞綰就佳人髻三閨裝成子弟羈欲  
辨坤維尋地理纔臨益部認郊廛文翁室暗封苔蘚葛  
亮祠荒享豆邊貨出軍儲推賑濟轉行交子頌輕便氣  
蒸蒟蒻根鬚潤日罩梗楠樹影圓藥寺風光蟲蟄外花  
潭邀樂鵲鳴前聚源待擬求鳧氏貯怨那能雪杜鵑叢

植森榮還蓊蔚夾流湍迅迴潺湲鮮明機杼知無算細  
碎錐刀不啻千合伴鴉鬟齊窈窕對陪霓袖競翩翾五  
門冷映岷峨雪千里爰疏灌圃泉茂盛八絃宜得最高  
腴十道比俱偏衰滋不到生無分段相重來宿有緣款  
召相如登兔苑驟遷太白步花甌葳蕤草木時為瑞奇  
秀江山代產賢曉後細風紅灼灼夜中微雨碧芊芊錦  
亭燄燭明歌障繡閣香毬熨煖檀寶塔徘徊停隼旗觀  
街雜沓擁輜輶醅醖引架家家郁躑躅攀條處處妍重

愛魯儒提德柄威降曹將董戎旃歡謠少負實人勇長  
講多經楚客禪似簇綺羅偏煥耀如流車馬倍喧闐堵  
機顯綽名堪錄題柱芬芳事莫捐李特鋒鉉徒恃險張  
儀規畫自持顛鷹揚器業成悠久烏合姦雄敗轉旋漫  
向鼎分澄霸道却當龜化驗都鄺強貪楚滅悲傾轍廣  
洽堯詢喜慕羶側弁猖狂拋玉笋歸鞍酩酊墮金鈿氛  
埃屏息雲常覆稼穡繁滋澤靡愆睿聖宵衣垂乃睠貴  
臣馳驛每傳宣石牛邁路加歆饗江瀆隆區助潔蠲避

暑亭臺珍簾設縱開池沼釣絲牽遮蠻帶礪長能固捍  
蜀金湯遠益堅何武甲科曾繼踵嚴真卜兆罕差肩儲  
書競甲諸家集博識咸修百氏箋紙碓暮春臨岸澣水  
樽春注截河壩華嚴像閣涼堪愛淨衆松溪僻可憐學  
射崔嵬橫罨靄放生寬廣媚漪漣蘼庭嫩筍青簋簋風  
檻新荷綠扇扇守戍貔貅千萬騎采葑簪笏兩三員清  
江瀉勢方流巽大面盤形正壓乾電掃谷風藏虎嘯雷  
瞋官樹灑龍涎卻占遯應星舒彩樂嚶端聆火撲然令

範式驅民缺缺咨謀疇倚道平平性寒甘蔗猱偷齧體  
膩芭蕉蠹莫沿誌讀備興重掩卷史看唐幸嬾終篇雕  
盤姹女呈酥作水巷癡童颺紙鳶初下城頭迷鄴杜暫  
來犀浦誤伊瀟變秦言語生皆會戀土情懷死不悛結  
厦斧斤宗簡易入神丹腹厲精專柳隄夜月珠簾捲花  
市春風繡幕塞十縣版圖分戶籍一城牌肆係民編受  
辛滋味饒薑蒜劇饌盤飧足鮪鱸月季冒霜秋宵挫荔  
枝衝瘴夏宜然幾番叢箐鳴虛籟是箇園林噪嬾蟬蠹

物乘時先養育菁英屆候別陶甄地丁葉嫩和嵐採天  
蓼牙新入粉煎平代啓闡聞繼岌監軍憑軾見劉焉  
蘭馥裒幽蹊畔菱芡交鋪曲島邊繒網晚晴誇蹴踘畫  
繩寒食戲鞦韆氤氲紫霧濛都邑縹緲丹霞聚倭佗螭  
伏自然銷劒戟螻蛄翻幾度起戈鋌宦遊止歎音塵闕鄉  
飲何驚歲月遄靈壽桃枝竒共結金砂銀礫貴相聯埋  
輪昔按均輸命叱馭今分太守權徒為行春飛阜蓋詎  
能許國報青錢政經旋考尤多僻民瘼深求尚未痊雖

愧袴襦非叔度日期毫墨有馮涓僊遵廉察思從訓克  
謹操修敢好畋南市醉過攢幟隊西樓歡坐列瓊筵煩  
囂謹畏傷淳厚惠黜周防近巧論重祿省心宜致寇薄  
材莊貌若臨淵扶危頗異巢居幕勸善還同矢在弦叨  
蒞一麾康遠俗等閒光景又三年

成都文類

王隨

隨字子正河南人舉進士累擢知制誥遷龍圖  
閣直學士仁宗景祐中拜門下侍郎同中書門



下平章事昭文館大學士罷除彰信軍節度使  
判河陽卒贈中書令諡章惠

題棲霞山房

虛窗殘燭明敲枕旅懷清永夜起松籟半天疑雨聲吟  
餘閒景象道勝小榮名鐘罷星河曙悠悠迴旆旌

金陵梵刹

志

臨終作

畫堂燈欲滅彈指向誰說去住本尋常春風埽殘雪

青箱

雜記

句

好客幾嫌州路僻愛山長上郡樓高

春探

水村煙暝早山

館夜寒多

旅店

掃徑苔痕破開扉竹影分

中庚錄

吟窗雜

一聲啼鳥禁門靜滿地落花春日長

官詞

桑斧剝春色漁

歌唱夕陽

歷代吟譜

掌禹錫

禹錫字唐卿郾城人中進士第歷官直祕閣英

宗卽位遷太子賓客以工部侍郎致仕卒嘗預  
修皇祐方域圖志及校正類篇本草圖經

句

風定落花深一寸日高啼鳥度千聲  
曉鶯林外千聲

囀芳草堦前一尺長

過庭錄掌禹錫博通子史百家作證類本草而  
訥于為文時賢頗以此鄙之嘗作詩云云歐公  
謂忽作人言

王洙

洙字原叔應天宋城人舉進士官直龍圖閣同  
判太常寺坐事黜知濠州徙襄州召還累遷翰  
林學士改侍讀兼侍講學士卒諡曰文

題峴山石幢

襄陽南出大路奔小山曰峴名特尊山形卑墮不峻極  
屹若巨首臨江濱大山半宮不成霍絕水闕左非為壘  
礪巔巔肩戴危石箕踞曼衍羅芳蓀漢流長驚濱其足  
東望瀾迤皆平原槎頭下瞰畧留集蔡洲近眺田園蕃

何物茲山匪秀出得使今古聞聽喧自昔羊公好登覽  
山名直為賢者存鹿門望楚鎮區境鳳林冠蓋延山樊  
丹巖翠壁互幽勝日月虧蔽煙嵐屯公胡遺彼而樂此  
談者未始聊診論吾謂聖達竟超豁高覽便欲周乾坤  
孔登泰山小天下阮升廣武歎豎昏會稽探穴禹書出  
之眾望海雲濤翻此中風景亦虛遠極目見盡江山源  
東吳未定勞機策置酒嘯詠紓憂煩數顧溫甫恤躬後  
誓將百歲游精魂對公盛德與山永正唯湛輩如公言

今茲去公僅千載凜然英氣猶軒軒我來追古一長息  
舊迹廢毀成悲吞民豪占山童其木嘉植不得容本根  
利取薪蘇積捆粢粥之陶旋供燒燔羊公無廟忽不祀  
但縱淫鬼歆牲饗中庭有碑卽墮淚至今觀者懷仁恩  
於民何誅不足問非民忘德由官愒下教里邑復祠宇  
敘諸祭典躋之元思仁愛樹恭所芟禁止樵伐修壩垣  
且欲王命得守固謐言狀事馳九閭書聞天子蒙報可  
金石款刻垂後昆使民永念古遺愛勗爾風化常丕敦

襄陽府志

呂夷簡

夷簡字坦夫先世萊州人祖龜祥知壽州遂家  
焉大理寺丞蒙亨之子宰相蒙正之猶子第進  
士慶厯初拜司空平章軍國重事封許國公薨  
贈太師中書令諡文靖有集

陳直齋云呂文靖詩清潤和雅

天花寺

賀家湖上天花寺一一軒窗向水開不用閉門防俗客

愛閒能有幾人來

老學菴筆記

江南立春

灰律何時應江春昨夜來細風先動柳殘雪不藏梅餘  
冷迷清管微和發凍醅閉門無客到樽俎為誰開

宋文鑑

重遊雁山

往來遊海嶠上徹最高層雲外疑無路山中忽見僧虎  
蹲臨澗石猿掛半巖藤何日拋龜紐孤峯上再登

雁山志



句

梅無驛使飄零盡草怨王孫取次生

早春

人為子推初禁

火花愁青女再飛霜

寒食

楊文公談苑

范 雍

雍字伯純世居河東父德隆葬河陽因家焉舉  
進士為洛陽簿天聖中累官樞密副使元昊叛  
拜鎮武軍節度使知延州左遷戶部侍郎復吏  
部侍郎知河南遷禮部尚書卒諡忠獻

紀西夏事

七百里山界飛沙與亂雲虜騎擇虛至戍兵常忌分嘯  
聚類宿鳥奔敗如驚麋難稽守邊謠應敵若絲棼

承平廢邊事備預久已亡萬卒不知戰兩城皆復隍輕  
敵謂小醜視地固大荒願因狂狡判從此葺兵防

劇賊稱中塞

中塞賊之勁悍者也

驅馳甲鎧精昔惟矜突騎

今亦教攻城伏險多邀擊驅羸每玩兵拘俘詢虜事肉  
盡一無聲

儒林公議夏寇既敗官軍劉平石元孫陷沒延  
州幾至不守雍日告朝廷益兵復為詩以言賊事  
凡數十章其傳播者云云蓋為前屢得賊中謀  
者雖齧其肉且盡終無一言故雍詩有云初朝  
廷輕視元昊邊臣奏請不甚允從至是方罪樞  
臣而逐之

## 王 奇

奇字漢謀贛縣人真宗時官至殿中侍御史

旅中有感 一作秋興

澤國來遊豈厭重羈孤懷感自無窮鴈聲不到歌樓上  
秋色偏欺客路中宿寺夢回蓮葉雨渡江衣冷荻花風

誰憐未得青雲志  
琴劍年年西復東  
詩林萬選

續縣令題雁詩

隻隻銜蘆背  
曉霜晝隨鴛鴦立  
寒塘晚來漁櫂驚飛去  
書破遙天字一行

贛州府志王奇少為縣掾史令題雁詩一聯于屏風奇密續後二句令奇之因激使學後游京師居李文靖沆客位真宗臨莫見屏間秋興詩召對稱旨特許殿試賜第奇作詩云不拜春官為座主親逢天子作門生官至殿中侍御史

楊偕

偕字次公中部人舉進士歷翰林侍讀學士左  
司郎中出知越州改杭州召為右諫議大夫以  
工部侍郎致仕

郡舍偶書

偃息鈴齋度歲華著書人盡笑聲牙斯文自信驚天地  
吾道誰知繫國家獨愛杉篁寒不變更憐江海濶無涯  
因思朝市爭名地何似優游刺史衙

宋文鑑

宋詩紀事卷九

欽定四庫全書

宋詩紀事卷十

錢塘厲鶚撰

李淑

淑字獻臣徐州豐人少傅若谷子年十二獻文  
行在真宗賜童子出身授校書郎景祐初知制  
誥除翰林學士累官戶部侍郎出知河中府卒  
贈尚書右丞有李公詩苑類格及別集

題周恭帝陵

弄楯牽車挽鼓催不知門外倒戈迴荒墳斷隴纔三尺  
猶認房陵半仗來

東軒筆錄淑在翰林奉詔撰陳文惠公神道碑  
李為人高亢少許可文章尤尚奇澀碑成殊不  
稱文惠之功烈文章但云平生能為二韻小詩  
而已文惠子述古等懇乞改去二韻等字荅以  
已經進呈不可刊削述古極銜之會李出知鄭  
州奉時祀于恭陵作詩云云述古諷寺僧刻石  
俄有以詩上聞者學士葉清臣等言本朝以揖  
遜得天下而淑誣以干戈仁宗亦深惡之遂落  
李所居職

題滑州解



滑守如今是世官阿戎出守自金鑾郡人莫訝留題別  
孫息期同住此看

青箱雜記李復圭三世皆知滑州天聖中其祖  
康靖公若谷知慶厯中其父邯鄲公淑又知後  
八年復圭又知前此邯鄲公嘗迎侍康靖題詩  
于州廨云云後復圭刻石記其事曰仰承遺訓  
允辨冥兆茲亦異也

朱 巽

巽揚州天長人真宗朝官至工部侍郎守雍州  
子壽昌因母劉被出棄官尋至同州得焉以孝

聞天下

句

塞垣古木含秋色祖帳行塵起夕陽

送劉綜學士出守并門詩話總龜

成銳

銳許州臨潁人應制科高第嘗以詩獻王丞相

隨

句

綵檻應無分春風不借恩

野菊

詩話總龜

林垌

垌福州羅源人真宗朝特奏名有南華集

詠瑞檜

古殿當年欲葺時  
槎牙高檜礙簷椽  
人間斤斧難容手  
天上風雷為轉枝  
烟色併來春益重  
月華饒得夜相宜  
吾皇一駐鑾輿賞  
從此聲名四海知

陳郁話腴真廟朝寢殿側有古檜秀茂不羣名  
御愛檜然橫礙殿簷真皇意欲去之一夕風雷  
轉指其枝因以為瑞題詠者多唯羅源林垌唐  
律稱旨賜號南華翁詩名由此大顯

李 旼

旼蜀人與任介郭震為莫逆交仕至尚書郎

送鈐轄館使王公

卻縠詩書奕世傳西人歌德別戎旃三朝功業標勳府  
四稔恩綏播蜀川耦射隔花聞破帖分題臨沼間中筵  
歸朝聖旨俞僉望畿內封侯養重權

成都文類

程 戡

戡字勝之陽翟人舉進士仁宗朝擢再知益州

累官戶部侍郎樞密副使尋拜鄜延路經畧安撫使英宗卽位召還道卒贈太尉謚康穆

送鈐轄館使王公

歸騎翩翩去路賒鬱蔥佳氣望天涯艱危劔閣三千里  
惠愛刀州十萬家龍尾道邊瞻日彩鹿頭關外別春華  
金明扈從宸遊處休憶連年泛浣花

成都文類

靳宗

送鈐轄館使王公

再任坤維報政成紫泥恩詔下神京搖鞭有客添歸興  
折柳何人不愴情杜宇江山經鳥道海棠池館憶龜城  
尊前執手難收淚投分從來比弟兄

成都文類

王景

送鈐轄館使王公

四稔總兵鈐轄裘叔子慙抗校遐徼伏敦信遠民詣赴  
召薰風布離襟臘酒酣吾皇思將帥有意在江南

成都文類

解程

送鈐轄館使王公

武帳推恩詔十行  
雍容鳴玉覲清光  
四年愛日民謠浹  
五月炎風驛路長  
劒閣煙雲迷去旆  
柳營笳鼓慘離觴  
浣花紙貴傳新集  
留得詩名繼許昌

成都文類

黃垧

送鈐轄館使王公

四年軍法表巴邛  
歸騎俄乘紫漢風  
家緒舊傳三祭貴  
將材元蘊萬人雄  
錦城離思雲容斂  
山國行章旆影紅

到日定知新渥重主寮今是黑頭公

成都文類

姚渙

送鈐轄館使王公

家傳勲力世能賢四載坤維領帥權南詔酋豪彌款附  
西州士庶賴蕃宣輸忠感慨由誠府接下恩勤自意筌  
月夕過從多命席花時酬唱旋成編雅歌餘暇軍容肅  
陟狀升聞帝願延馳驛遽趨三召節執圭俄覲九重天  
漢廷儀衛咸祗若蜀郡名僚共黯然賜對定應留晷刻



疇庸當便進班聯聖神倚注期蕃錫宥密崇高待九遷  
下客塵勞遇知已願言攀附跂英躔

成都文類

田瑜

送鈐轄館使王公

閩外膺宸寄坤維握虎兵真純逾璞玉方重敵長城肯  
構詩名著承家將畧明四年凝茂績一節促歸程水際  
旌旗影風前鼓吹聲西州懷惠愛北闕被恩榮護衛親  
嚴近雍容侍穆清分攜暫銷黯良會在神京

成都文類

高惟幾

惟幾官殿丞

送鈐轄館使王公

遊宦俱為關外人與君五看海棠春園林選勝聯鑣徧  
風月相思命駕頻大旆先時辭蜀道短轅何日見京塵  
子牟又起離羣恨欲操行祛重愴神

成都文類

海棠

故國庸岷外孤根楚苑中使梅休妒白仙杏已饒紅旋

恐陽城破尋憂下蔡空幾時夢巫峽獨立怨春風

海崇譜

張靖

送鈐轄館使王公

保塞昔年嘗閉壘甘陵今歲又勞師將軍鎮蜀功多少  
不見干戈出虎皮

玉勒嘶風出錦城山光野色助離情行行莫倦神華遠

芳草連雲伴去程

成都文類

范諷

諷字補之齊州人舉進士第累官翰林侍讀學士給事中知兗州遷光祿卿

儒林公議范諷性疎誕嘗忤外計求監舒州靈仙觀莊獻太后臨朝聞其俊邁召拜諫官好朋飲高歌嘯呼或不冠幘禮法之士深疾之顏太初作東州逸黨詩以譏之

題鼎州甘泉寺

平仲酌泉回北望謂之禮佛向南行烟嵐翠鎖門前路  
轉使高僧厭寵榮

湘山野錄鼎州甘泉寺介官道之側嘉泉也便于漱酌行客未有不舍車而留者始寇萊公南

遷曰題于東檻曰平仲酌泉經此回望北闕黯  
然而行未幾丁晉公又過之題于西檻曰謂之  
酌泉禮佛而去後范補之安撫湖南留詩于寺  
云

### 題濟南城西張寺丞園亭

園林再到身猶健官職全拋夢乍醒惟有南山與君眼  
相逢不改舊時青

能改齋漫錄

### 石延年

延年字曼卿一字安仁其先幽州人家宋城真  
宗錄三舉進士為三班奉職歷太子中允同判

登聞鼓院有集

歐公詩話曼卿卒後其故人有見之者云恍惚如夢中言我今為鬼仙也所主芙蓉城欲呼故人往遊不得忿然騎一素驃去如飛其後又云降于亳州一舉子家又呼舉子去不得因留詩一篇與之余亦畧記其一聯云鶯聲不逐春光老花影長隨日腳流神仙事怪不可知其詩頗類曼卿平生語舉子不能道也

詩林廣記石曼卿詩如飢鷹乍歸迅速不可言隱居詩話石延年長韻律詩善敘事其他無大好處籌筆驛銅雀臺留侯廟詩為一集之冠五言小詩如海雲含雨重江樹帶蟬疎平蕪遠更綠斜日寒無輝者幾矣

相江詩話曼卿一日春初見堦砌初生之草其屈如鉤而顏色未變因得一句云草屈金鉤綠

未回遂作早春詩一篇旬日方成曰簷垂冰筋  
晴先滴草屈金鉤綠未回其不逮先得之句遠  
甚

雞肋集曼卿以天聖四年來令金鄉故詩為此  
邑人作者如題張氏園亭詩云樂意相關禽對  
語生香不斷樹交花尤為佳句也

文獻通考張浮休評曼卿詩如飢雁夜歸巖冰  
秋拆俊爽有餘不可尋繹

### 題孫可久別墅

南北霑河潤幽深在禁城疊山資遠意讓俸買閒名閑  
戶斷蛛網折花移鳥聲誰人識高趣朝隱石渠生

青箱雜記仁宗朝內臣孫可久賦性恬淡年踰  
五十卽乞致仕都下有居第堂北有小園城南

有別墅每良辰美景以小車載酒優遊自適曼卿過其居題詩云云

平陽代意一篇寄師魯

十年一夢花空委依舊山河損桃李雁聲北去燕西飛  
高樓日日春風裏眉比石州山對起嬌波淚落妝如洗  
汾河不斷天南流天色無情淡如水

澠水燕談石曼卿天聖寶元間以歌詩豪于一時死後故人闕詠夢曼卿曰生平作詩多矣獨常自以為平陽代意一首最為得意而世人罕稱之能令予此詩盛傳于世在永言耳詠覺增廣其詞隱度以迷神引聲韻于是天下爭歌之他日復夢曼卿來謝



下第偶成集句

一生不得文章力欲上青雲未有因聖主不勞千里詔  
嫦娥何惜一枝春鳳皇詔下雖需命豺虎叢中也立身  
啼得血流無用處著朱騎馬是何人

年去年來來去忙為他人作嫁衣裳仰天大笑出門去  
獨對春風舞一場

西清詩話

曹太尉西師

仁者雖無敵王師尚有征獨乘金殿馬都領鐵林兵肅

氣闌河暮屯烟部落晴旗光秋燒合甲色夜江橫士喜  
擊中鼓敵疑聞後鉦無私乃時雨不殺是天聲濯濯前  
誰拒堂堂彼自傾寒踰博望塞春宴隗囂城外使戎心  
伏旁資帝道平公還如畫像為贊學班生

金鄉張氏園亭

亭館連城敵謝家四時園色鬪明霞窗迎西渭封侯竹  
地接東陵隱士瓜樂意相關禽對語生香不斷樹交花  
縱遊會約無留事醉待參橫月落斜

以上宋文鑑

籌筆驛

漢室虧皇象坤乾未卽寧姦臣與逆子搖嶽復翻溟權  
表分江域曹袁鬪夏垆虎奔咸逐逐龍臥獨冥冥從衆  
非無術欺孤迺不經惟思恢正道直起復炎靈管樂韜  
方畧關徐駭觀聽一言俄遇主三顧已忘形南旣清蠻  
土東期赤魏庭出師功自著治國志誰銘歷劒兵如水  
臨秦策若瓴舉聲將潰虜橫勢欲逾涇仲達恥巾幘辛  
毗嚴壁局可煩親細務遽見墮長星戰地悲陵谷來賢

賞德刑意中流水遠愁外遠山青想像音微在侵尋毛  
骨醒遲留慕英氣沈歎撫青萍

中山詩話石曼卿獨行京師一豪士揖之曰公  
幸過我同入委巷抵大第歌舞歡醉丐書為揮  
籌筆驛數詩以金帛數百千贈之他日遇諸塗  
又遺以白金數兩謂曰詩中意中流水遠愁外  
遠山青最為佳句

蘆浦筆記右驛在蜀中綿州石曼卿為諸葛武  
侯賦也寶元二年大書以遺朱復之後二年朱  
為四明節度推官遂刻石于廳事

春陰

寒食少天色春風多柳花倚樓心目亂不覺見棲鴉

前賢

小集拾遺

瀑布

飛勢挂嶽頂無時向此傾  
玉虹垂地色銀漢落天聲  
萬大寒雲濕千巖暑氣清  
滄浪不足羨就此濯塵纓

詩林萬選

燈

迴鱗抱雙蒂倒鳳吐丹榮  
冰宇寒生暈風疏動有聲  
燼

垂金藕細影透玉荷清  
斗帳依東壁誰人夢不成

合璧事類

外集

南朝

南朝人物盡清賢不是風流卽放言  
三百年間卻堪笑絕無人可定中原

後村詩話

送人遊杭

激激霜風吹黑貂男兒醉別氣飄飄  
五湖載酒期吳客六代成詩倍楚橋  
水樹漸青含晚意江雲初白向春嬌

前秋亦擬錢唐去共看龍山八月潮

咸淳臨安志

古松

宋趙師吳刻石在四明府治

直氣森森恥屈盤鐵衣生澀紫鱗乾影搖千尺龍蛇動  
聲撼半天風雨寒蒼蘚靜綠離石上絲蘿高附入雲端  
報言帝室掄材者便作明堂一柱看

至正四明續志

句

行人晚更急歸鳥夕無行 天寒河影淡山凍瀑聲微  
水盡天不盡人在天盡頭 草白有時榮髮白不再  
好人生不如春髮白不如草 弋下失冥鴻網細遺巨  
鯤 風勁香逾遠天寒色更鮮秋天買不斷無意學金

錢 洛渚微波常映步漢宮香水不濡肌 獨步世無

吳苑豔渾身天與漢宮香 恥生湯武干戈域寧死唐

虞揖遜區 中散向人疎懶甚步兵因酒過差多

以上後村

詩話

狄遵度

遵度字元規侍郎裴之子長沙人以父任為襄

城簿早卒有集

遜齋閒覽狄遵度幼而聰慧弱冠為文詞氣豪邁有韓柳之風其為歌詩每以子美為法既而友



人有往湘中者乃為文使之耒陽弔子美之墳  
數日忽夢子美與之反覆誦誦其平生所為詩  
十餘篇皆世所未聞者及覺彷彿可記纔十餘  
字

佳城篇續夢中作

時年十六

佳城鬱鬱頽寒烟孤雛乳獸號荒阡夜臥北斗寒挂枕  
霜拱木落雁連天浮雲西去伴落日行客東逝隨長川  
乾坤未毀吾尚在肯與螻蛄論大年

侯鯖錄遵度慕杜子美韓退之句法一夕夢子  
美自誦其逸詩既覺猶記其兩句云夜臥北斗  
寒挂枕木落霜拱雁連天遵度因足成之  
夢溪筆談狄遵度夢中句有丘墓閒意不數月

卒

和渙之深秋月夜書事

洞庭葉下涼颼颼凍天頑白凝不流圓月擬缺不忍缺  
輕露欲浮終未浮憶吹朱籟鳳輶上更采紫芝雲嶠陬  
玉樓天半幾千尺珠樹玲瓏懸上頭

宋文鑑

詠芭蕉

植蕉低簷前雙叢對含雨葉閒求丹心一日視百俯胸  
中數寸赤不惜為君吐心盡腹亦空況復霜雪苦非無

後凋意柔脆不足禦

全芳備祖

魏野

臧奎

陳越

野字仲先號草堂居士蜀人後居陝州東郊真  
宗西祀聞其名遣中使召之野閉戶踰垣而遁  
天禧三年卒贈祕書省著作郎有草堂集鉅鹿  
東觀集

澠水燕談上聞野居有幽致遣人圖之故野有  
句云幽居帝畫看

玉壺野史魏野字仲先其詩固無飄逸俊邁之  
氣但平朴而常不事虛語爾如贈寇萊公云有

官居鼎鬲無地起樓臺及謝寇萊公見訪云驚  
回一覺遊仙夢村巷傳呼宰相來

夢溪筆談野以詩著當世顯人多與之遊北都  
有妓女美色而舉止生梗人謂之生張八野贈  
詩有君為北道生張八我是西州熟魏三之句

晨興

夜長久待得晨興耽枕僮猶喚不應燒葉爐中無宿火  
讀書窻下有殘燈臨堦短髮梳和月傍岸衰容洗帶冰  
料得巢禽翻怪訝尋常日午起慵能

六一詩話此詩本是燒葉爐中無宿火或有嫌  
燒葉之語為貧寒太甚改葉字為藥字不惟壞

此一句併下句減氣味矣

閒居書事

無才動聖君養拙住西村  
臨事知閒貴澄心覺道尊  
成家書滿屋添口鶴生孫  
仍喜多時雨經春免灌園

謝寇萊公見訪

晝睡方濃向竹齋  
柴門日午尚慵開  
驚回一覺遊仙夢  
村巷傳呼宰相來

書友人屋壁

曰琯按集作書俞逸人屋壁起結句  
小異今從方氏

達人輕祿位居處傍林泉洗硯魚吞墨烹茶鶴避烟  
閒惟歌聖代老不恨流年靜想閒來者還應我最偏

瀛奎律髓真宗祀汾陰遣使召之題此詩壁間  
遁去使還以詩奏上曰野不來矣先是上嘗圖  
种放所居野居亦有幽致又令圖之

### 春日述懷

春暖出茅亭攜筇傍水行  
易諧馴鹿性難辨鬪雞情  
妻喜栽花活兒誇鬪草贏  
翻嫌我慵拙不解強謀生

### 冬日書事

十月天不暖前村到豈能閒聞啄木鳥疑是打門僧壞  
砌平山雪空堂照瀑冰晚來因出戶方始暫攜藤

題普濟院

河上似江邊寺臨河掩關百年人自老一閣意常閒野  
闊連天碧苔多徧地斑數聲離岸櫓幾點別州山寒食  
花藏縣重陽菊遶灣懸崖分鳥道隔水似塵寰雨急和  
僧語雲高共鶴攀磬聲喧水檻旛影落波瀾雁去歸汾  
曲槎來犯斗間冷齋如有暇到此屢開顏

暮秋閒望

水閣閒登覽郊原欲刈禾  
壞簷巢燕少積雨病蟬多  
砧隔寒溪擣鐘隨曉吹過  
扁舟何日去江上負烟蓑

夏夜與臧奎陳越會宿河亭聯句三十韻

雨破畏日沈月出酷暑歇

野

衙中河亭上靜與山不別

良朋俱遠來文會一何悅

越

箕踞巾舄閒玩好琴樽列

野煩禮厭拘攣陳言誓擺脫

奎

揮麈影參差飯菜香馥

烈

越

酒令時解嚴談鋒久不缺

野

樂天無荒淫飽德異



號餐

奎

高談聞謔浪正義排詭譎抗俗絕依違評文無

詆訐

野

輿論鄙譎張奴學賤剽竊

奎

徵引角競出聯唱

更相發

越

較善合權衡馳義同軌轍

野

萬物情難逃千

古疑皆決

奎

聖道約扶持淫辭謀劓刖

越

風鑒定妍媸

天機藏巧拙

野

是物有廢興惟道無本末

奎

義路自坦

夷世途終兀臬

越

烈士死光輝常徒生汨沒

野

逸義小

風雲直筆輕斧鉞

奎

孟軻心不動陶潛腰恥折

越

疲倦

僕屢更輝映燭頻跋

野

浩歌不成調狂舞寧赴節

奎

氣

候隨斗占分野為星別

越

葢韻時斷續漁燈乍明滅

野

河聲疑地震電影若天裂

奎

飄風奪輕紉零露透疎葛

越

酒海傾屢空詩源浩不竭

野

咸平己亥歲二年時六

月

奎

此會是何人其名野奎

越

以上鉅鹿東觀集

貽王魏公

旦

人間宰相惟三載君在中書十四年西祀東封俱已了  
好來平地作神仙

蒙齋筆談天禧末王魏公求退不許野寄以詩  
魏公亟袖以聞遂得謝

題壁絕句

誰人把我狂詩句寫向添蘇繡戶中間暇若將紅袖拂

還應勝得碧紗籠

續湘山野錄魏處士貌寢性敏志節高尚鳳閣舍人孫僅與野敦編素之舊尹京兆日寄野詩說府中之事野和之其末有見說添蘇亞蘇小隨軒應是珮珊珊之句添蘇長安名姬也孫頗愛之一日謂添蘇曰魏處士詩中以爾方蘇小如何添蘇曰處士詩名藹于天下著鄙薄在其間是蘇小之不如矣又何方之乎孫大喜以野所和詩贈之添蘇以未見野深懷企慕求善筆札者大署其詩于堂壁夸鬻于人未幾野抵長安好事者密召過添蘇家不言姓氏添蘇見野

風貌魯質固不前席野忽舉頭見壁所題添蘇  
曰魏處士見譽之作野殊不荅乃索筆于其側  
別紀一絕添蘇知是野大加禮遇

清明

無花無酒過清明興味蕭然似野僧昨日鄰翁乞新火

曉窗分與讀書燈

合璧事類前集

尋隱者不遇

尋真誤入蓬萊島香風不動松花老採芝何處未歸來

白雲滿地無人掃

古今詩話

句

千林蠹如盡一腹餒何妨

庚溪詩話仲先詠啄木鳥句司馬溫公頗稱之

吉凶終在我翻覆謾勞君

竹杯琰同上

慕退難饒客琴生卻

問兒雁急長天外颿遲落照中  
五色中偏貴千花

後獨尊

菊

以上後村詩話

林逋

逋字君復錢塘人隱西湖之孤山真宗聞其名

詔長吏歲時勞問卒賜諡和靖先生有集

歸田錄逋工于書善為詩如梅花詩云疎影橫斜水清淺暗香浮動月黃昏評者謂前世詠梅者多矣未有此句也及其臨終為句云茂陵他日求遺藁猶喜曾無封禪書尤為人稱誦自逋之卒湖山寂寥未有繼者

青箱雜記逋景祐初尚無恙范文正公亦過其廬贈逋詩曰巢由不願仕堯舜豈遣人又曰風俗因君厚文章到老醇其激賞如此

山村冬暮

衡茅林麓下春氣已微茫雪竹低寒翠風梅落晚香樵期多獨往茶事不全忙雙鷺有時起橫飛過野塘

宿洞霄宮

大滌山相向華陽路暗通風霜唐碣朽草木漢祠空  
石苔花碧丹池水氣紅幽人天柱側茅屋灑松風

秋山不可盡秋思亦無垠碧澗流紅葉青林點白雲  
涼陰一鳥下落日亂蟬分此夜芭蕉雨何人枕上聞

西湖

混元神巧本無形匠出西湖作畫屏春水淨于僧眼碧  
晚山濃似佛頭青藥爐粉堵搖魚影蘭杜烟叢閣鷺翎

往往鳴榔與橫笛斜風細雨不堪聽

湖上初春偶作

梅花開盡臘亦盡晴暖便如寒食天春色半歸湖岸寺  
人家多上郭門船文禽相並暎短草翠潏欲生浮嫩烟  
幾處酒旗山影下細風時已弄繁弦

酬畫師西湖春望

笛聲風暖野梅香湖上凭闌日漸長一樣樓臺圍佛寺  
十分烟雨蒺漁鄉鷗橫殘葑多成陳柳映危橋未著行



終約吾師指芳草靜吟閒步岸華陽

梅花

衆芳搖落獨暄妍占盡風情向小園疎影橫斜水清淺  
暗香浮動月黃昏霜禽欲下先偷眼粉蝶如知合斷魂  
幸有微吟可相狎不須檀板共金尊

吟懷長恨負芳時為見梅花輒入詩雪後園林纔半樹  
水邊籬落忽橫枝人憐紅豔多應俗天與清香似有私  
堪笑羗人亦風味解將聲調角中吹

詩話總龜黃山谷云歐陽文忠公極賞林和靖  
疎影橫斜水清淺暗香浮動月黃昏之句而不  
知和靖別有詠梅一聯云雪後園林纔半樹水  
邊籬落忽橫枝似勝前句文章大概亦如女色  
好惡止繫于人

詠蜨

細眉雙聳敵秋毫荏苒芳園日幾遭清露宿花應自得  
暖風和絮欲爭高情人歿久魂猶在傲吏齊來夢亦勞  
閒掩遺編苦堪恨不并香草入離騷

深雪偶談精緻不減唐人

頃得宛陵葛生所茹筆每用之如麾百勝之師橫  
行於紙墨間所向無不如意惜其久且弊作詩以  
錄其功

神鋒雖缺力終存架琢珊瑚欠策勲日暮閒窓何所似  
灞陵憔悴故將軍

以上和靖詩集

茗溪漁隱叢話殊有憫勞念舊之意

制誥李舍人以松扇二柄并詩為遺亦次來韻

編松為簾寄山中兼得紫薇詩一通入手涼生殊自慰

可煩長聽隱居風

孤山雪中寫望

片山兼水遶晴雪復漫漫一徑何人到中林盡日看遠

分樵載

昨蓋切

重斜壓葦叢乾樓閣嚴城寺疎鐘動晚

寒

孤山從上人林臺寫望

林表秋山白鳥飛此中幽致世還稀誰家岸口人烟晚

坐見漁舟兩兩歸

送史殿省典封川

炎方將命選朝倫  
治行何嘗下古人  
擁旆肯辭臨遠郡  
登艫還喜奉慈親  
水連芳草江南地  
烟隔寒梅嶺上春  
若過中途值歸雁  
慰懷能與致音塵

春日齋中偶成

空階重疊上垣衣  
白晝初長社燕歸  
落盡梅棠人臥病  
春風時復動齋扉

江村銷夏錄載五詩真迹跋云殿直丁君自沂  
適閩棹舟惠顧晤語未幾且以拙詩為索病中

援筆勉書數章少塞好事之意耳時皇上登寶  
位歲夏五月孤山北齋手書林逋記

句

隱非秦甲子病有晉春秋 水天雲黑白霜野樹青紅  
風回時帶笛烟遠忽藏村

後村詩話五言尤難工林和靖一生苦吟自摘  
出十三聯今惟五聯見集中如句云云皆不在  
焉

唐 異

異字子正

朱長文琴史唐處士子正才藝甚高肥遯不出  
李西臺建中時謂善書而子正之筆實左右之  
江東林逋亦稱墨妙一見而歎曰唐公之筆老  
而彌壯崔論德時謂善琴而子正之音嘗唱和  
馬高平范公從而師之嘗貽之書曰崔公旣沒  
琴不在茲乎二妙之外尤嗜風雅探幽索奇不  
知老之將至意淳語真不為憤悅文正公嘗稱  
其如此

### 閒居書事

幽居經宿雨屐齒徧林塘一徑無過客千峯自夕陽晝  
禽多獨語夏木有餘涼招隱書慵寄時清誰肯忘  
宋文鑑

### 韓退

退字知止絳州人

絕句

山下跨雪精上便不論程  
嗅地打不動笑天休始行

溫公續詩話韓退處士絳州人放誕不拘浪跡  
秦晉間以詩自名嘗跨一白驢有詩云云好著  
寬袖鶴氅醉則鶴舞石曼卿贈詩曰醉狂玄鶴  
舞閒臥白驢號

黃亢

亢字清臣浦城人有東溪集

宋史新編亢年十五以文謁翰林學士章得象  
得象奇之遊錢唐以詩贈處士林逋逋尤激賞



時王隨知杭州奏禁西湖為放生池亢作詩數  
百言士人爭傳之

### 臨水

人生朝復暮水波流不駐去年昨日水今日到何處惆  
悵雨殘花嫣紅隨水去花落水東流識盡人生事一作趣

### 宋文鑑

荆溪林下偶談文鑑載黃亢臨水詩云去年昨  
日水今日到何處蓋蹈襲杜牧題安州浮雲  
樓寄湖州張郎中云當時樓下水今日到何處

### 令狐揆

### 欽定四庫全書

揆字子先安陸人

句

借書離近郭冒雪渡寒溪

王得臣塵史令狐子先安陸鄉先生也並仕齊  
安理掾歲滿還里卜築涓溪之南耕釣之外著  
書彈琴而已時入城至集賢張君房之第借書  
布衣林逸善繪事乃擬摩詰寫浩然故事以為  
令狐秋掾雪中渡鄖溪圖其序畧曰張侯畜書  
萬卷掾嘗就閱或假輟以歸兼出入跨羸馬頂  
戴華陽紗巾著墨慘布襪繫條小童攜書簾負  
琴以隨冬中復來假書時值微雪飄灑景物蕭  
索掾渡溪以歸常服外加以阜繒暖帽委轡長  
吟曰借書離近郭冒雪渡寒溪聞者毛骨寒聳

是知至人操履倬越風韻體裁乃與天地四時之氣相參焉先生諱揆云

## 高言

言字明道汴人

## 呈友人

昨夜陰風透膽寒地爐無火酒鉗乾男兒慷慨平生事

時復挑燈把劍看

青瑣高議

## 段全

全與丁謂同時人稱段推官

句

斜搗花腳面闊大打廉攄

上官融友會談叢段全薄有才思不拘細行歷  
幕席浪別陝右務嘲諧取悅于人雷掾丁謂好  
蹴踘既貴後亦為之全撰鞠詩二十韻以獻內  
有句云云稱為中的

張仲威

仲威官舒州守

設醮靈仙觀

瑞氣蔥蔥雨露邊璧門金闕倚層巔青霓絳節嚴中夜

綠蓋丹輿會九天香染舊泥封寶洞聲傳鳴鶴湛靈泉  
分明步入烟霄上何必餐霞駐少年

宋藝圃集

廖齊

永州有感

下馬連聲叩竹門主人何事感遺恩回頭泣向兒童道  
重見甘棠舊子孫

青瑣後集廖齊父爽直嘗為永州刺史齊後遊  
零陵于民間見父題壁感而成詩


周序

經少陵墓

在鞏縣

杜陵詩客墓遙倚北邙巔  
斷碣居人識高名信史傳  
猿聲悲落照樹色翳寒烟  
唯有文章在輝光夜燭天

河南府志



宋詩紀事卷十